



Kamis, 29 Juli 2021

Ogen: Masmur 46:11



Pimpinen Tuhan



Kegeluhenta i doni enda desken sada pedalinen nepet kempak sada tujun. I bas perdalinen e mbue kal rungsa-rungsas si man bentasen si erbahansa la banci meter erdalan. Rungsas e banci pinakit si mekelek, si erbahansa kulanta kote la ergegeh, arus ngadi la ngasup neruske peradalanen. Banci ka perbeben si mberat, erkiteken ekonomi surut, terlebih i bas masa pandemi, bencana alam si nderpa kita; banjir, lonsor, kepesengen, gempa bumi, erupsi gunung berapi si banci encedai sinuan-sinuan, pencarin ras inganta tading. Lanai bo terbeligai uga buena rungsa-rungsas si ngolangi kita i bas perdalinen geluh enda.

Labo kepe ngasup kita si sada ndalanisa. Guna seh ku bas tujun ndai la baci lang lit arus geges si deban si nampati. Si perlu lit i bas kita eme semangat, maju terus i bas pimpinen Tuhan. Nina anak-anak bani Korah Dibata kap kecion dingin gegeshta, lalap IA sikap nampati katawari kita i bas kesusahen. Dibata e setia tuhu, iperdiatekenNa kita kerina, uga kerna kecibalta ras kai siniperluken kita, la IA tunduh natap kita. Tupung bas kesusahen pe IA ras kita.

Sura-sura Tuhan e me kap, ngadi erperang. Bisana adi kalak erperang enggo lit i je sura-sura nguasai kalak si deban. Perlu pengakun maka ia lebihen asa kalak si deban. Uga pe manusia hebatna la pernah banci ibaboina Dibata. Tuhan kap Dibata, IA kap si meganjangna i bas kerina bangsa-bangsa, Ia kap si meganjangna i belang-belang doni enda. Amin pe IA erkuasa ras ringan i basingan si meganjangna lalap nge kita iperdiatekenNa. si meganjang ukur ipeterukNa, janah si nggit erdalan i bas pimpinenNa iarak-arakNa. Pimpinen Tuhan e me si mabai kita seh kempak tujun. Uga gia sekali kecibalta ula ngadi, erdalan terus. Tatapken langkah, Tan Tuhan ncikep tanta enteguh.